

摘藻堂四庫全書薈要

子部

欽定四庫全書薈要卷一萬五百六十六

子部

御定佩文齋廣羣芳譜卷三

天時譜

三月

寒食清明上巳穀雨附見

增禮記月令季春之月日在胃昏七星中旦牽牛中註
日月會於大梁而斗建辰之辰也 桐始華 萍始生
乃爲麥祈實 是月也生氣方盛陽氣發泄勾者畢
出萌者盡達不可以內 命野虞母伐桑柘鳴鳩拂其

羽戴勝降於桑註蠶將生之候也 具曲植籩筐后妃

齋戒親東鄉躬桑禁婦女毋觀省婦使以勸蠶事 梁

元帝纂要三月曰季春亦曰暮春末春晚春 原花月

令是月也白桐榮荼蘼條達牡丹始繁麥吐華棟花應

候楊入大水爲萍 增瓶史月表三月花盟主牡丹滇

茶蘭花碧桃花客卿川鵲梨花木香紫荊花使令木筆

薔薇謝豹丁香七姊妹郁李長春 花歷三月木筆書

空棣萼韡韡海棠睡繡毬落

彙考增詩幽風蠶月條桑取彼斧斨以伐遠揚周頌
嗟嗟保介維暮之春亦又何求如何新畲於皇來牟將
受厥明註暮春斗柄建辰夏正之三月也夏小正三
月參則伏攝桑萎楊傳攝桑攝而記之急桑也萎楊楊
則花而後記之采識傳識草也祈麥實傳麥者五
穀之先見者故急祈而記之也拂桐芭傳拂也者桐
芭之時也或曰言桐芭始生貌拂拂然也淮南子三
月官鄉其樹李昏張中則務種穀汜勝之書三月榆

英舒 四民月令三月杏花盛可蓄白沙輕土之田

風土記三月雨謂之迎梅 初學記三月雨曰榆莢雨

夢溪筆談三月華葉從根而生故曰從魁 賞心樂

事三月花院月丹花院桃柳蒼寒堂西緋碧桃滿霜亭

北棣堂碧宇觀筍芳草亭觀草鬪春堂牡丹芍藥宜雨

堂千葉海棠艷香館林檎花院紫牡丹宜雨堂北黃薔

薇瀛壑勝處山花經寮鬪茶犀仙繪幅樓芍藥 聞見

近錄故事李春上池賜生花自上至從臣皆簪花而歸

演繁露三月花開時風名花信風初汎觀則似謂此風來報花之消息耳按呂氏春秋曰春之得風風不信則其花不成乃知花信風者風應花期其來有信也

寒食原四民月令齊人呼寒食爲冷節 寒食以麪爲

蒸餅樣團棗附之名曰棗饅 鄴中記并州俗冬至後

百五日爲介子推斷火冷食三日 荆楚歲時記去冬

至一百五日即有疾風甚雨謂之寒食 增玉燭寶典

寒食爲大麥粥研杏仁爲酪引餒沃之 酉陽雜俎寒

食賜近臣麥粥帖綵毬鏤鷄子 原零陽總記蜀人遇

寒食用楊桐葉并細冬青葉染飯色青而有光食之資

陽氣道家謂之青精乾餽食今俗以夾麥青草搗汁和

糯米作青粉團烏柏葉染烏飯作糕是此遺意 金門

歲節洛陽人家寒食日裝萬花輿煮桃花粥 增揮麈

後錄朱新仲少仕江寧在王彥昭幕中有代彥昭春日

留客致語云寒食止數日間才晴又雨牡丹葢數種枝

欲拆又芳皆魯公帖與牡丹譜中全語也 乾淳歲時

記清明前三日爲寒食節都城人家皆插柳滿簷雖小

坊幽曲亦青青可愛大家則加棗餠於柳上然多取之

湖堤有詩云莫把青青都折盡明朝更有出城人熙

朝樂事清明前兩日謂之寒食人家插柳滿簷青萋可

愛男女亦咸戴之諺云清明不戴柳紅顏成皓首清

明原素問清明次五日牡丹華四民月令清明節令

蠶妾理蠶室是月也杏花盛種百穀志林東坡在

黃州夢參寥誦所作新詩覺而記兩句云寒食清明都

過了石泉槐火一時新夢中曰火固新矣泉何故新答

曰俗以清明日淘井 春明退朝錄周禮四時變火唐

惟清明取榆柳火以賜近臣戚里宋朝惟賜大臣順陽
氣也 增提要錄清明雨爲杏花雨 歲時雜記清明

湖州進紫筍茶 東京夢華錄清明日都人出郊往往

就芳樹之下或園囿之間羅列杯盤互相勸酬抵暮而
歸各攜名花異果山亭戲具謂之門外土儀轎子即以
楊柳雜花裝簇頂上四垂遮映緩入都門斜陽御柳醉

歸院落明月梨花最爲盛景 是月季春萬花爛漫牡

丹芍藥棣棠木香種種上市賣花者歌叫之聲清奇可

聽 穀雨孝經緯清明後十五日斗指辰爲穀雨言雨

生百穀也 牡丹譜洛陽以穀雨爲牡丹開候而一百

五者長至一百五日開最先 溫公文集註洛陽人謂

穀雨爲牡丹厄 居家宜忌穀雨日採茶炒藏能治痰

嗽及療百病熱疾 上巳原後漢書禮儀志三月上巳

日官民皆禊於東流水上 宋書禮志魏以後但用三

日不復用已 韓詩外傳鄭國之俗上巳於溱洧之上

招魂續魄秉蘭草祓除不祥 荆楚歲時記上巳日取

鼠麴汁蜜和粉謂之龍舌料以厭時氣 千金月令三

月三日上踏青履 增洛陽圖經上巳日婦女以薺花

點油祝而灑之水上若成龍鳳花卉之狀則吉謂之油

花卜 酉陽雜俎唐中宗三月三日賜侍臣細柳圈言

帶之免蠱毒 原賞心樂事三月三日男女皆戴薺花

諺云三春戴薺花桃李羞繁華 五色線荆楚歲時記

三月三日四民踏百草今人因有鬪百草之戲鄭谷詩
云何如鬪百草賭取鳳凰釵

集藻文賦散句原梁昭明太子錦帶書景逼徂春時臨
變節啼鶯出谷爭傳求友之音翔蘂飛林競散佳人之
靨晉張協洛禊賦夫何三春之令月嘉天氣之氤氲
和風穆以布暢百卉曄而敷芬阮瞻上巳賦臨清川
而嘉讌聊假日以遊娛蔭朝雲而爲蓋托茂樹以爲廬
好脩林之翳鬱樂草莽之扶疎列肆筵而設席祈吉祥

於斯塗 增簡文帝晚春賦待餘春於北閣藉高譙於

南陂水篩空而照底風入樹而香枝嗟時序之迴幹歎
物候之推移望初篁之傍嶺愛新荷之發池石憑波而
倒植林隱日而橫垂 蕭子範家園三日賦惟茲嘉月

悅此時良庭散花蘂傍插筠篁灑玄醪於沼沚浮絳棗
於泱泱觀翠淪之出沒戲青舸之低昂 周庾信三日

華林園馬射賦於時玄鳥司歷蒼龍馭行羔獻冰開桐
華萍合皇帝幸於華林之園千乘雷動萬騎雲屯落花

與芝蓋同飛楊柳共春旗一色 原唐王勃三月上巳祓

禊序遲遲風景出沒媚於郊原片片仙雲遠近生於林薄
雜花爭發非止桃蹊羣鳥亂飛有踰鶯谷王孫春草處處
爭鮮仲阮芳園家家並翠於是携旨酒列芳筵先祓禊於
長洲却申交於促席 王維暮春逍遙谷讌集序巖谷先
曙羲和不能信其時芳卉後春勾芒不能一其令桃徑窈
窕蘅臯超忽驂御延佇於叢薄珮玉升降於蒼翠 蕭穎
士蓬池禊飲序禊逸禮也鄭風有之蓋取諸勾萌發達陽

景敷煦握芳蘭臨清川乘和蠲絜用徼介祉厥義存矣
四言古詩增晉張華三月三日後園會暮春元日陽氣
清明祁祁甘雨膏澤流盈習習祥風啟滯導生禽鳥翔
逸卉木滋榮纖條被綠翠華合英

五言古詩

御製時巡近郊憫農事有作芳郊景物麗淑氣扇暮春靈雨
應良節光風薄佳辰省耕已屆候夙駕方來巡前驅列式
道羽衛羅鈎陳時有田間子荷耒披車塵譏訶勿頻數疾

苦當咨詢千耦幸終畝二鬴猶懸困穠蓂爾勤動痾瘵予
隱親調賜出泉府拊循屬官臣行潦有挹器列井無枯津
所惠良未徧嗟嗟愧斯人

增宋謝忠連三月三日曲水集四時著平分三春稟融
爍遲遲和景婉天天園桃灼攜朋適郊野昧爽辭塵郭
斐雲興翠嶺芳颿起華薄解轡偃崇丘藉草遶迴壑際
渚羅時較託波汎輕爵 宋鮑照三日氣暄動心思柳
青起春懷時艷憐花藥服淨俛登臺提觴野中飲愛心

煙未開露色染春草泉源潔冰苔泥泥濡露條娟娟承
風栽鳬雛掇苦薺黃鳥銜櫻梅解衿欣景預臨流競覆
杯美人竟何在浮心空自摧 原梁簡文帝三日侍宴
林光殿曲水詩芳年多美色麗景復妍遙握蘭惟是旦
採艾亦今朝迴沙溜碧水曲岫散桃夭綺花非一種風
絲亂百條雲起相思觀日照飛虹橋繁華炫姝色燕趙
艷妍妖金鞍汗血馬寶髻珊瑚翹蘭馨起縠袖蓮錦束
瓊腰相看隱綠樹見人還自嬌玉桂鳴羅薦渠枕泛迴

潮洛濱非拾羽滿握詎貽椒

晚春紫蘭葉初滿黃鶯

哢不稀石蹲還似獸蘿長更如衣水曲文魚聚林暝雅
鳥飛渚蒲變新節巖桐長舊圍風花落未已山齋開夜
扉 沈約三日率爾成篇麗日屬元巳年芳具在斯開

花已匝樹流鶯復滿枝洛陽繁華子長安輕薄兒東出
千金堰西臨鴈鶩陂清晨戲伊水薄暮宿蘭池寧憶春
蠶起日暮桑欲萎 增庾肩吾三日侍蘭亭曲水宴策
星依夜動鑾駕總朝遊旌門臨苑樹相風出鳳樓春生

露泥泥天覆雲油油桃花舒玉澗柳葉暗金溝襍川分

曲沼帳殿掩芳洲踴躍鱗魚出參差絳棗浮百戲俱臨

水千鍾共逐流 隋蕭慤春晚春庭聊縱望樓臺自相

隱窻梅落晚花池竹開新筍泉鳴知水急雲來覺山近

不愁花不飛到畏花飛盡 唐白居易寒食洛下宴遊

贈馮李二少尹豐年寒食節美景洛陽城三尹皆強健

七日盡清明東郊蹋青草南園攀紫荆風折海榴艷露

墜木蘭英假開春未老宴合日屢傾珠翠混花影管絃

藏水聲佳會不易得良辰亦難并聽吟歌暫輟看舞杯
徐行米價賤如土酒味濃於餽此時不盡醉但恐負平
生殷勤二曹長各捧一銀觥 崔護郡齋三月下旬作
春事日已歇池塘曠幽尋殘紅披獨墜嫩綠間淺深偃
仰捲芳褥顧步愛新陰謀春未及竟初夏遽見浸 溫

庭筠寒食節日寄楚望芳蘭無意綠弱柳何窮縷心斷
入淮山夢長穿楚雨繁花如二八好月當三五愁碧竟
平臯韶紅換幽圃流鶯隱員樹乳燕喧餘哺曠望戀層

臺離憂集環堵當年不自遣晚得終何補鄭谷有樵蘇

歸來要腰斧 宋歐陽脩暮春幽憂無以銷春日靜愈

長薰風入花骨花枝午低昂往來採花蜂清蜜未滿房

春事已爛漫落英漸飄揚蛺蝶無所爲飛飛助其忙啼

鳥亦屢變新音巧調簧遊絲最無事百尺拖晴光天工

施造化萬物感春陽 陸游春晚書齋壁海棠已成雪

桃李不足言纖纖麥被野鬱鬱桑連村穉蠶細如螳杜

宇號朝昏展墓秣餌美坐社黍酒渾早筍漸上市青韭

初出園老夫下箸喜盡屏鷄與豚幽居亦何樂且洗兩
耳喧呼兒燒柏子悠然坐東軒 原明文徵明妍英弄
芳意麗色含春姿物華浩無涯駘蕩東風吹東風日已
熙草色日已滋青春萬里道遊子有所思浮雲漏白日
宿露朝已晞攀條惜婉麗忽得瑛瓊枝芳踪未有托暮
景已西馳菁華難復恃結蘊聊自怡

七言古詩增唐宋之間寒食陸渾別業洛陽城裏花如
雪陸渾山中今始發旦別河橋楊柳風夕卧伊川桃李

月伊川桃李正芳新
寒食山中酒復春
野老不知堯舜
力酣歌一曲太平人
王維寒食城東即事
清谿一道

穿桃李演漾綠蒲涵
白芷谿上人家凡幾家
落花半落東流水
蹴踘屢過飛鳥上
鞦韆競出垂楊裏
少年分日作遨遊
不用清明兼上巳
李賀三月樂詞東方風來

滿眼春花城柳暗
愁殺人複宮深殿竹風起
新翠舞衿淨如水
光風轉蕙百餘里
暖霧驅雲撲天地
軍裝宮妓掃蛾淺
搖搖錦城夾城暖
曲水飄香去不歸
梨花落盡

成秋苑

宋邵雍三月吟滿城盡日行春去言念行春

還有數真宰何曾不發生遊人其奈無憑據梨花著雨
漫成啼柳絮因風爭肯住一片清明好意多奈何意好
難分付

明楊基清明看花吉祥寺裏千堆錦綠髮仙

人對花飲腰鼓金盤五色藍醉歸猶帶花枝寢東風壬
子幾清明三百年來寺已傾沙河塘上癡兒女猶頌錢
塘太守名看花我亦逢壬子况是清明非偶爾莫論南
浦與西湖楚水吳山正相似青蓮居士識前因金粟如

來見後身總不能知塵外劫也須曾是會中人

原何

景明長安三月百花殘滿城飛絮何漫漫千門萬戶東
風起陌上河邊春色闌美人高樓鎖深院白花濛濛落
如霰晴窓窈窕朝日遲亂入簾櫳起雙燕遊絲相牽時
裊裊委地飄廊不須掃君不見江頭綠葉吹香綿隨波
化作浮萍草

五言律詩

御製春日內苑賜宴詩并序已未三月律應姑洗望日之吉

賜內閣大臣及侍衛宴於內苑時乃玩花於絳雪玉樹含
風浮杯於西齋金池漾月飲酒樂甚因率題四韻以示羣
臣春深內苑裏珍席宴羣臣蝶向雙檐舞花飛複閣新和
羹期上佐調鼎協洪鈞簫鼓歡無極芳年醉此辰

增唐李益春晚賦得餘花落留春春竟去春去花如此
蝶舞遶應稀鳥驚飛詎已衰紅辭故萼繁綠扶凋蘂自
委不勝愁庭風那更起原柳中庸寒食春暮越江邊
春陰寒食天杏花香麥粥柳絮伴鞦韆酒是芳菲節人

當桃李年不知何處恨已解入箏弦 張又新三月五

日泛長沙東湖上已餘風景芳辰集遠垌湖光迷翡翠
草色醉蜻蜓鳥弄桐花日魚翻穀雨萍從今留勝會誰
看畫蘭亭 增項斯晚春花陰洞日光薄花開不及時

當春無半樹經燒足空枝踈與香風會細將泉影移此
中人到少開盡幾人知 原唐彥謙上已寄韓八上已

接寒食鶯花寥落晨微微潑火雨草草踏青人涼似三
秋景清無九陌塵與余同病者對此合傷神 增宋余

靖暮春草帶全鋪翠花房半墜紅農家榆莢雨江國鯉

魚風堤柳綿爭撲山櫻火共烘長安少年客不信有衰

翁蘇軾雨晴散步雨過浮萍合蛙聲滿四隣海棠真

一夢梅子欲嘗新拄杖閒挑菜鞦韆不見人殷勤木芍

藥獨自殿餘春張九成晚春即事幽事晚山色幽齋

春雨餘亂紅欹澗水浮綠漲郊墟北牖迸新筍西園生

野蔬槿籬遶茅屋已分老樵漁范成大寒食郊行隴

麥欣欣綠山桃寂寂紅帆邊魚蕖浪木末酒旗風信步

隨芳草迷途問小童賞心添脚力呼渡過溪東 陸游

山家暮春遶屋清陰合緣堤綠草纖起蠶初放食新麥
已磨鎌苦筍先調醬青梅小蘸鹽佳時幸無事酒盡更
須添 戴昺次韻春事海棠紅未了又近牡丹時送日
多忙事酬春欠好詩暖風吹麥早晴晷轉花遲不盡清
遊興重爲上巳期 陳與義寒食草草隨時事蕭蕭傍
水門濃陰花照野寒食柳圍村客袂空佳節鶯聲忽故
園不知何處笛吹恨滿清尊 僧契嵩山亭晚春小庭

晚來靜林石自巉巖犬去吠人語花飛恣鳥銜晴煙熏
茂草照日藹高杉更喜團圓月清光下碧巖 明李禎
三月四日即景忽忽春將暮俄過三月三草誰憐益母
花自媚宜男乍到尋巢燕初眠上箔蠶新茶與稱筍鄉
味憶江南

七言律詩增唐皇甫冉三月三日義興李明府後亭泛
舟江南煙景復如何聞道新亭更可過處處藝蘭春浦
綠萋萋藉草遠山多壺觴須就陶彭澤風俗猶傳晉永

和更使輕撓徐轉去微風落日水增波
杜牧殘春獨

來南亭因寄張祐暖雲如粉草如茵獨步長堤不見人

一嶺桃花紅錦韞半溪山水碧羅新高枝百舌猶欺鳥

帶葉梨花獨送春仲蔚欲知何處在苦吟林下拂詩塵

溫庭筠寒食日作紅深綠暗逕相交抱暖含芳披紫

袍綵索平時牆婉婉輕毬落處晚寥梢窓中草色妬鷄

卵盤上芹泥憎燕巢自有玉樓芳意在不能騎馬度煙

郊
原李山甫寒食柳帶東風一向斜春陰淡淡救人

家有時三點兩點雨到處十枝五枝花萬井樓臺疑繡

畫九原珠翠似煙霞年年今日誰相問獨卧長安泣歲

華 來鵬清明日與友人遊玉粒塘莊幾度春山共陸

郎清明時節好風光細穿綠荇船頭滑碎踏殘花屐齒

香風急嶺雲飄迴野雨餘田水落芳塘不堪吟罷東回

首滿耳蛙聲正夕陽 寒食山館書情獨把一杯山館

中每經時節恨飄蓬侵堦草色連朝雨滿地梨花昨夜

風蜀魄啼來春寂寞楚魂吟後月朦朧分明記得還家

夢徐孺宅前湖水東 增韓偓春盡日樹頭初日照西

簷樹底薦花夜雨霑外院池亭聞動鎖後堂闌檻見垂

簾柳腰入戶風斜倚榆莢堆牆水半淹把酒送春惆悵

在年年三月病厭厭 原韋莊長安清明早是傷春暮

雨天可憐芳草更芊芊內官初賜清明火上相閑分白

打錢紫陌亂嘶紅叱撥綠楊高映畫鞦韆遊人記得承

平事暗喜風光似昔年 增宋王禹偁寒食今年寒食

在商山山裏風光亦可憐稚子就花拈蛺蝶人家依樹

繫鞦韆郊原曉綠初經雨
巷陌春陰乍禁煙
副使官閑
莫惆悵酒錢猶有撰碑錢
韓琦上巳瓊林苑賜筵春

光濃簇寶津樓樓下新波漲
鴨頭嘉節難逢真上巳
賜筵榮入小瀛洲
仙園雨過花遺靨
御陌風長絮作毵
襖飲不須辭
巨白清明來日尚歸休
蔡襄上巳日杭州

東園地上多於枝上花
東樓凝望惜年華
潮頭正對伍員廟
燕子爭歸百姓家
粉籜漸高山徑筍
綠旗初展石巖茶
流芳自與人兼老尊
酒相逢莫重嗟
原歐陽修

清明賜新火魚鑰侵晨放九門天街一騎走紅塵桐花
應候催嘉節榆火推恩忝侍臣多病正愁錫粥冷清香
但愛蠟煙新自憐慣識金蓮燭翰院曾經七見春 曹
組寒食輦下海棠時節又清明塵紋煙收雨乍晴幾處
青帘沽酒市一竿紅日賣花聲綵毬時向梭門過繡轂
遙隨輦路行日暮人人醉歸去熙熙春物見昇平 范
成大上巳日萬歲池呈程詠之
濃春酒暖絳烟霏漲水
天平雪浪遲綠岸翻鷗如北渚紅塵躍馬似西池麥苗

翦翦嘗新麪梅子雙雙帶折枝試比長安水邊景祇無
饑客爲題詩 陸游春晚雨足人家插稻秧蠶生隣女

採桑黃萬花掃迹春將暮百草吹香日正長閒窺啼鶯
穿北崦戲隨飛蝶過東岡飄然且喜身强健不怪兒曹
笑老彊 楊萬里寒食雨作雙燕衝簾報禁煙喚驚書

夢聳詩肩晚寒正與花爲地曉雨能令水作天桃李海
棠聯病眼清明寒食又經年老來不辦雕新句報答風
光且一篇 三月十日纔看桃李錦城圍忽便園林綠

作堆遠草將人雙眼去飛花引蝶過牆來簿書節裏無

多著懷抱朝來得好開已是七分春去了何須鳥語苦

相催 吳龍翰春晚郊行芒鞋竹杖出柴關簡點園林

脚不聞翠幄初張花作局錦棚成列筍爲班煙波鷗鷺

春風外桑柘牛羊夕照間野興不須邀客共芳樽濁酒

對黃山 許月卿三月三月春如年少時了知造化最

兒嬉智行無事柳飛絮道發自然花滿枝錦繡園林添

富貴神仙院落闌清奇老天長似春三月游戲人間不

皺眉

元王惲清明日錦隄行樂浪說蘭亭禊事脩年

年春好錦隄遊花翻舞袖驚歌板柳隔高城暗酒樓綠
樹恐應春事老金鞭重爲使君留竹西路晚歸時醉何
處珠簾半上鉤

李孝光次晚春韻燕幕沈沈春晝永

閒敲碁子小闌東拍天漲綠連朝雨滿地殘紅昨夜風
草際夢回詩有債柳邊寒薄絮無功韶光暗換千年事
莫遣閒愁著鬢中

明楊基江村寒食預折楊枝插繞

簷荳糜香軟麥餠甜春衣未染新絲織午篆猶分舊火

添小雨送春青見萼輕雷催筍碧抽尖不因人遠傷離
別那得春愁上短髯 沈周上巳日漫作和風晴日正
宜春碧柳紅桃得得新老謝祓除何故事健追行樂有
閒身鄰翁採薺分家小遊女採花打路人不限長安水
邊好太平隨地總堯民

五言排律增唐白居易春末閒出來輕屐徐行踏軟沙
觀魚倚湓浦看竹入楊家林迸穿籬筍藤飄落水花雨
埋釣舟小風颺酒旗斜嫩剝青菱角濃煎白茗茶淹留

不知夕城樹欲棲鴉

五言絕句

御製途次逢寒食何處來春風淡蕩開晴旭
不見杏花紅纔逢柳梢綠

增唐嚴維江南三月江南李春天萼菜細如弦湖邊草
作逕湖上葉如船原劉禹錫春晚思悠哉花葉自相
催漠漠空中去何時天際來增崔道融春晚三月寒
食時日色濃於酒落盡牆頭花鶯聲隔原柳寒食夜

滿地梨花白風吹碎月明大家寒食夜獨貯望鄉情

七言絕句

御製清明已日纔從江岸行舟中還復度清明上林聞道花
遲發留與歸時聽早鶯 清明登玉泉山寒食登高芳草

青泉聲映柳覆春亭心中懷得天然處對對沙鷗樂野汀
原唐沈佺期上巳日祓禊渭濱應制寶馬香車清渭濱
紅桃碧柳禊堂春皇情尚憶垂竿佐天祚先呈捧劍人
增錢起暮春歸故山草堂谷口殘春黃鳥啼辛夷花

盡杏花飛始憐幽竹山窓下不改清陰待我歸 原韓

翊寒食日即事春城無處不飛花寒食東風御柳斜日

暮漢宮傳蠟燭輕煙散入五侯家 增竇鞏襄陽寒食

寄宇文籍煙水初銷見萬家東風吹柳萬條斜大隄欲

上誰相伴馬踏春泥半是花 武元衡陌上暮春青青

南陌柳如絲柳色鶯聲晚日遲何處最傷游客思春風

三月落花時 韓愈晚春草樹知春不久歸百般紅紫

鬪芳菲楊花榆莢無才思惟解漫天作雪飛 杜牧春

晚題韋家亭子擁鼻侵襟花草香高臺春去恨茫茫薦

紅半落平池晚曲渚飄成錦一張溫庭筠三月十八

日雪中作芍藥薔薇語早梅不知誰是艷陽才今朝領

得東風意不復饒君雪裏開方干寒食日百花香氣

傷行人花底垂鞭日易曛野父不知寒食節穿林轉壑

自燒雲成彥雄暮春日宴溪亭寒食尋芳遊不足溪

亭還醉綠楊煙誰家花落臨流樹數片殘紅到檻前

宋邵雍禁烟題錦屏山下二首寒食風煙錦屏下凭高

把酒興何如滿川桃李風妍媚不忍重爲風破除
無涯桃李待清明經歲方能開得成不念化工曾著力狂
風何故苦相陵秦觀三月晦日節物相催各自新癡
心兒女挽留春芳菲歇去何須恨夏木陰陰正可人

張耒晚春睡足高簷春日斜碾聲初破小龍茶樓邊綠
樹飛紅盡春色牆陰老薺花范成大三月四日驟暖

日脚融晴晚氣暄睡餘初覺薄羅便如何柳絮沾泥處
暖似槐陰轉午天春晚客去鈎窓詠小詩遊絲撩亂

柳花稀微風盡日吹芳草蝴蝶雙雙貼地飛 夕陽槐

影上簾鉤一枕清風夢昔遊夢見錢塘春盡處碧桃花

謝水西流 楊萬里三月廿七日送春只餘三日便清

和儘放春歸莫恨他落盡千花飛盡絮留春肯住欲如

何 王鎡深春夾泥花上舊巢邊翠箔桑空蠶又眠天

氣乍晴風候別坐看盆藕出雙錢 燕子來時春又休

暖風吹綠上枝頭繡簾不隔荼蘼月香影無人自入樓

僧道潛春晚曉風池沼水瀾翻春盡淮南麥秀寒院

落無人日停午柳花如雪滿闌干 金高士談寒食燕

泥半落烏衣巷柳色全添綠綺窓且伴丁香過寒食弄
晴蝴蝶一雙雙 元宋褰春詞嬌春楊柳暗藏鴉掩映

文窓一樹花寒食清明都過了悄無車馬問儂家

詩散句增齊邢子才芳春時欲遽覽物惜將移新萍已
冒沼餘花尚滿枝 唐王維年光三月裏宮殿百花中

李嘉祐清明桑葉小度雨杏花飛 韋應物清明寒

食好春園百卉開 原賈島晴風吹柳絮新月起厨煙

白居易二月草萋萋黃鶯歌又啼 增溫庭筠晚風

楊葉社寒食杏花村 司空圖人家寒食月花影午時

天 宋徐鉉東風不好事吹落滿庭花 韓琦春寒芳

意晚未見柳飛綿 楊萬里荔子園園花寒食日日雨

原唐李白江邊石上誰知處綠戰紅酣別是春 杜

甫落花遊絲白日靜鳴鳩乳燕青春深 劉禹錫草色

淺深圍幄幕花枝上下逐鞦韆 胡曾金絡馬銜原上

草玉釵人折路傍花 崔魯杏酪漸香隣舍粥榆煙欲

變舊爐灰

韓偓惻惻輕寒翦翦風杏花飄雪小桃紅

張泌青草浪高三月渡綠楊花發一溪煙 弱柳未

勝寒食雨好花爭奈夕陽天 韋莊錦江風散霏霏雨

花市香飄漠漠塵 宋韓琦白楊花落眠蠶老紅杏枝

殘笑靨圓 興慶池頭三月三柳如拖綬草如衫 晏

殊夾道桃花新過雨馬蹄無處避殘紅 蘇舜欽春陰

垂野草青青時有幽花一樹明 歐陽修杯盤餚粥春

風冷池館榆錢夜雨新 九門寒食多遊騎三月春陰

正養花

王安石已著單衣猶禁火
海棠花下怯黃昏

蕭蕭三月閉柴荆
綠葉陰陰忽滿城

蘇軾北城寒

食烟火微落花蝴蝶作團飛

藍尾忽驚新火後
遨頭

要及浣花前

謝逸點點花飛春事晚
青青芳草暮愁

生 增范成大桃杏滿村春似錦
踏歌椎鼓過清明

石門柳綠清明市
洞口桃花上巳山

元龔璠今年石

湖好清明每樹梨花香雪晴

周權杜宇青山三月暮

桃花流水一溪雲

馬臻潑火雨晴餽粥冷
落花風暖

筍興輕 原唐劉禹錫楚香寒食橘花時 陸羽人買

山茶先穀雨 李商隱粥香餠白杏花天 增宋徽宗

茸母初生識禁煙 邵雍三月初三花正開 上巳觀

花花意濃 原蘇軾火冷餠稀杏花稠

詞增宋謝懋憶少年池塘綠遍王孫芳草依依斜日遊

絲捲晴晝繫東風無力 蜨趁幽香蜂釀蜜秋千外卧

紅堆碧心情費消遣更梨花寒食 劉克莊憶秦娥遊

人絕綠陰滿野芳菲歇芳菲歇養蠶天氣采茶時節

枝頭杜宇啼成血
陌頭楊柳吹成雪
吹成雪淡烟疎雨

江南三月

趙長卿畫堂春
小亭煙柳水溶溶
野花白

白紅紅惱人池上
晚來風吹損春容
又是清明天氣

當年小院相逢
凭欄幽思幾千重
殘杏香中原
賀鑄

柳梢青子規啼血
可憐又是春歸時
節滿院春風
海棠

鋪繡梨花飛雪
丁香露泣殘枝
悄未比愁腸寸結
自

是休文多情多感
不干風月
李清照怨王孫
帝里春

晚重門深院
草綠堦前暮天
鴈斷樓上遠
信誰傳恨綿

綿 多情自是多沾惹難拚捨又是寒食也鞦韆巷陌
人靜皎月初斜浸梨花 明王世貞玉樓春是誰約勒
東君去枝上曉聲寒杜宇柔絲猶能抵死留妖紅不解
逡巡住 灞陵一陣飄香雨宛轉玉驄蹄下土記他含
蘂拆芭時總有千金無贖處 宋趙令時蝶戀花欲減
羅衣寒未去不捲珠簾人在深深處紅杏枝頭花幾許
啼痕止恨清明雨 盡日水沉香一縷宿酒醒遲惱破
春情緒飛燕又將歸信誤小屏風上西江路 增趙善

扛十拍子柳絮飛時綠暗荼蘼開後春酣花外青帘迷

酒思陌上晴光收翠嵐佳辰三月三解佩人逢游女

踏青草關宜男醉倚畫欄欄檻北夢繞清江江水南飛

鷺與共鶼原明葉道卿鳳凰閣遍園林綠暗渾如昨

翠幄下無一片是花萼可恨狂風橫雨忒煞情薄盡底

把韶華送却楊花無奈是處穿簾透幕豈知人意正

蕭索春去也這般愁沒處安著怎奈何黃昏院落王

世貞青玉案鴨頭波染濃於耐風起處紅香青皺乳燕

雙雙簾幙透梨花未雪綠楊猶絮
蜂飽桑陰瘦無端釀出清明候
忽憶城南乍分手十二闌干寒更陡
踏青人遠鬪茶時近滋味如中酒
宋辛棄疾祝英臺近寶釵分桃葉
渡煙柳暗南浦陌上層樓十日九
風雨斷腸點點飛紅都無人管倩
誰喚流鶯聲住鬢邊覩試把花卜
歸期纔簪又重數羅帳燈昏哽咽
夢中語是他春帶愁來春歸何處
又不解帶將愁去滿江紅家住江
南又過了清明寒食花徑裏一番
風雨一番狼籍紅粉

暗隨流水去園林漸覺清陰密算年年落盡刺桐花寒
無力 庭院靜空相憶無處說閒愁極怕流鶯乳燕得
知消息尺素如今何處也綠雲依舊無踪跡謾教人羞
去上層樓平蕪碧 增李琳六么令淡煙疎雨香逕渺
啼鴂新晴畫簾閑卷燕外寒尤力依約天涯芳草染得
春風碧人間陳迹斜陽今古幾縷遊絲趁飛蝶 誰向
尊前起舞又覺春如客翠袖折取薦紅笑與簪華髮回
首青山一點簷外寒雲疊梨花著雨柳花飛絮夢繞闌

干滿園雪 施岳曲游春畫鼓西冷路占柳陰花影芳
意如織小楫衝波度麴塵扇底粉香簾隙岸轉斜陽隔
又過盡別船簫笛倚斷橋翠繞紅圍相對半篙晴色
頃刻千家暮碧向沽酒樓前猶繫金勒乘月歸來正梨
花夜縞海棠煙幕院宇明寒食醉乍醒一庭春寂任滿
身露濕東風欲眠未得

別錄原占候三月有三卯宜豆無則麥不收 月內有
暴水謂之桃花水主多梅雨無則無 清明有水而渾

主高低田大熟雨水調 朔日值清明草木茂值穀雨

主年豐 上巳聽蛙聲上晝叫上鄉熟下晝叫下鄉熟

終日叫上下齊熟聲啞低田熟聲響低田澇 種植穀

黍芝蔴薏苡黑豆御麥棉花白扁豆蠶豆刀豆紅豆葫

蘆茄豇豆落花生生菜菠菜蒜菜茼蒿蔥山藥稔瓠子

茭筍稍瓜香芋蘿蔔韭王瓜南瓜冬瓜菜瓜蘘荷茴香

薑大豆銀杏葡萄薤土瓜荸薺芋香菜櫻桃枸杞椒紫

蘓白蘓天茄望江南梨菊牛芻鳳仙薄荷玫瑰十樣錦

藕栗百合雞冠山丹紅花紫草薇獨帚草麻子石竹罌
粟商陸葵決明麻 移植石榴地黃楊梅木瓜梧桐柑

橘夜合冬青寶相檜桑海棠橙菱木槿麗春玉簪杉槐
芙蓉薔薇秋海棠芭蕉楮梔子木香醒頭香紫萼 貼

接柑柚橙橘玉蘭棗香櫟柿接桃桐接栗杏接梅 收

採筆管菜藤花椿芽萋蒿蒲公英槐芽菊芽金雀花薺
菜黃棟芽牛膝蕨芽葵菜藜菜看麥娘黃連芽葛花灰
菟薇菜斜蒿老鸛嘴蓬蒿芽水苔紫草車前葉牛舌科

厚朴紫花王瓜鈎藤天茄苗鴈兒腸狗脊土瓜荊芥碎
米薺天門冬芫花白附子澤蘭川芎芽紫參根防葵穀
精草艾紫葛根皮紫背浮萍夏枯草蕪荑實白朮青箱
莖葉澤漆莖葉羊躑躅白薇根玄參小水萍桑寄生黃
芩防風芽射干根 整頓開溝渠犁秧田理花棚浸稻
出菖蒲鋤蒜拔蓬 製用千金月令三月三日採艾挂
戶風乾以備醫藥 四時纂要三月三日取桃花片至
七月七日和烏雞血塗面與身 萬花谷三月三日宜

沐枸杞湯

便氏要纂三月採夏枯草煎汁熬膏治遠

年損傷

田忌天火午地火申九焦戌荒蕪丑糞忌辰

御定佩文齋廣羣芳譜卷三

謹案卷二第九頁前三行山公還已醉刊本山公
訛出山據全唐詩改

第十一頁前五行稍聞泱泱流水谷刊本泱泱訛
泱泱據蘓詩改

第十一頁後二行春來不飲兼無句刊本飲訛欲
據宋詩改

第十二頁後七行風光行處好刊本行訛何據唐
詩改

第十六頁前五行染得桃紅似肉紅刊本上紅字

訛花據東坡詞改

卷三第十頁前六行弱柳何窮縷刊本縷訛縷據

溫集改

第十頁前八行流鶯隱員樹刊本員訛園據溫集
改

第十六頁前五行風急嶺雲飄迴野刊本雲訛南

據全唐詩改



總校官庶吉士_臣侍朝

校對官檢討_臣王福清

謄錄監生_臣孔廣枚

欽定四庫全書薈要

子部

御定廣羣芳譜卷四

詳校官主事臣陳木

欽定四庫全書薈要卷一萬五百六十七

子部

御定佩文齋廣羣芳譜卷四

天時譜



增補記鄉飲酒義南方者夏夏之爲言假也養之長之

假之仁也爾雅夏爲朱明註氣赤而光明夏爲長

羸尸子南方爲夏夏興也南任也萬物莫不任興蕃

殖充盈也原梁元帝纂要夏曰朱夏炎夏三夏九夏

天曰昊天風曰炎風節曰炎節草曰茂草雜草木曰蔚
林茂林密樹茂樹

彙考增禮記王制夏薦麥 周禮秋官薙氏掌殺草春

始生而萌之夏日至而夷之 原晉書嵇康傳康性絕

巧而好鍛宅有一柳樹甚茂乃激水環之夏月居其上

以鍛 山海經朱提郡堂狼山多毒草盛夏之月飛鳥

過之亦不得去 淮南子武王蔭暍人於柳下而天下

懷 增淮南子夏取果蓏注有核曰果無核曰蓏 薺

麥夏死而人曰夏生生者衆

尚書考靈曜夏火星昏

中可以種黍

原括地圖天毒國最熱夏則草木皆乾

語林陸機在洛夏月忽思東頭竹篠飲語劉寶曰吾

思鄉轉深矣

增敘聞錄嵇昌蓄採星盆夏月漬果則

倍冷

原杜陽雜編李輔國夏月堂中設迎涼草其色

碧幹似苦竹葉細於杉刺之牕戶間舉室皆涼

增熙

朝樂事西湖夏夜觀荷最宜風露舒涼清香徐細傷花
淺酌如對美人倩笑款語也 清閒供夏時晨起菱荷

爲衣倚花枝吸露午後刻椰子杯浮瓜沉李搗蓮花飲
碧芳酒日晡浴罷掉小舟垂釣於古藤曲水邊薄暮籜
冠蒲扇立層岡看火雲變現 林下盟暑月晚涼浴罷
杖履逍遙臨池觀月乘高取風採蓮剝芡剖瓜雪藕白
醪三杯取醉而適其爲樂殆未可以一二數也

集藻文賦散句增梁江淹四時賦 炎雪峯起芳樹未移
臯蘭生坂朱荷出池憶上國之綺樹想金陵之蕙枝
唐王勃夏日登韓城門樓序驚花亂下戲鳥平飛荷葉

滋而曉露繁竹院靜而炎氣息
宋王炎夏日郊行賦
麥穰穰而餅餌桑陰陰而繭絲麻旆旆而没人秧芄芄
而布畦

五言古詩增梁江總夏日還山庭獨於幽棲地山庭暗
女蘿澗漬長低篠池開半卷荷野花朝暝落盤根歲月
多停尊無賞慰狎鳥自經過
梁簡文帝納涼斜日晚

駸駸池塘生半陰避暑高梧側輕風時入襟落花還就
影驚蟬乍失林遊魚吹水沫神蔡上荷心翠竹垂秋采

丹棗映疎砧無勞夜遊曲寄此託微吟
隋薛道衡梅

夏應教長廊連紫殿細雨應黃梅浮雲半空上清吹隔
池來集鳳桐花散騰龜蓮葉開幸逢爲善樂頻降濟時
才
唐韋應物園亭覽物積雨時物變夏綠滿園新殘
花已落實高笋半成筠守此幽棲地自是忘機人
宋

秦觀田居入夏桑柘稠陰陰翳虛落新麥已登場餘蠶
猶占箔隆曦破層陰霽霽收遠壑雌蜺卧淪漪鮮飈泛
叢薄林深鳥更鳴水漫魚知樂羸老厭煩歆解衣屢磻

薄陰樹濯涼颼起行遺帶索冢婦餉初還丁男耘有託
倒筒備青錢鹽茗恐垂索明日輸絹租鄰兒入城郭

七言古詩增宋歐陽修歸田樂南風原頭吹百草草木
叢叢茅舍小麥穗初齊稚子嬌桑葉正肥蠶食飽老翁
但喜歲年熟餉婦安知時節好野棠梨密啼晚鶯海石
榴紅囀山鳥田家此樂知者誰我獨知之歸不早乞身
當及強健時顧我嗟跼已衰老原梅堯臣夏熟六龍
銜火燒寰宇魏王冰井若湯煮松枝桂葉凝若癡喘殺

溪頭嘯風虎北冥融却萬丈冰千觔凍鼠忙如蒸我聞
土土長飛雪此時日睨地皮裂仙芝瑤草不敢茁湘川
竹焦琅玕折西郊雲好雨不垂堆青疊碧徒爾爲增
元薩都拉新夏曲紅泣香枯怨流水夜放籥龍千尺尾
風生宮樹曉層層涼綠一簾收不起煙乾寶鴨白晝清
祝融緩轡行且停薔薇花深霧冥冥碧牕睡起香滿肱
何中山中樂隄柳綠搖新罨畫石榴紅摺嬌裙衩蓮
蕩風閒翡翠欹菱塘雨定鴛鴦下溪女浣紗朝出村行

官飲水暮歸舍瓦餅手挈隔年醅石下坐圍明月夜山
中之樂誰得知我獨知之來何爲空裏烏蟾飛影過桑
麻課效勝書帷原鄭奎妻夏月詞芭蕉葉展青鸞尾
萱草花含金鳳嘴一雙乳燕出雕梁數點新荷浮綠水
困人天氣日長時鍼線慵拈午漏遲起向石榴陰畔立
戲將梅子打鶯兒

五言律詩增唐駱賓王夏日遊目暫屏塵囂累言尋物
外情致逸心逾默神幽體自輕浦夏荷香滿田秋麥氣

清詎假滄浪上將濯楚臣纓
夏日遊山家返照下層

岑物外狎招尋蘭徑薰幽佩槐庭落暗金
谷靜風聲徹
山空月色深一遣樊籠累唯餘松桂心
杜審言夏日

過鄭七山齋共有樽中好言尋谷口來
薜蘿山徑入荷
芰水亭開日氣含殘雨雲陰送晚雷
洛陽鐘鼓至車馬
繫遲回
韋應物夏花明夏條綠已密朱萼綴明鮮
炎日正午灼灼火俱燃
翻風適自亂照水復成妍
歸視
窗間字熒煌滿眼前
許渾長興里夏日南鄰避暑侯

家大道傍蟬噪樹蒼蒼開鑠洞門遠下簾賓館涼欄圍
紅藥盛架引綠蘿長永日一欹枕故山雲水鄉 宋韓

琦夏景即事槐耳籠前檻雲峯透曲櫺涼風即崑閬煩
思入滄溟荷弱翻青蓋榴新倒綠鉗晚來收驟雨一枕
夢魂醒 邵雍春盡後園閒步綠樹成陰日黃鶯對語

時小渠初潏濫新竹正參差倚杖閒吟久攜童引步遲
好風知我意故故向人吹 張耒夏日過雨芟荷亂繁
陰竹樹多雛聲知鳥哺萍動見魚過細逕饒苔蘚陰牆

引薜蘿角中從倒側疎懶欲如何
蚓壤排晴圃蝸涎
印雨階花鬚嬌帶粉樹角老封苔
問字病多忘過鄰幃
却迴晚涼還盥櫛對竹引清杯
細徑依原僻茅蓬四
五家山田來雉兔溪雨熟桑麻
竹籠晨收果茅菴夜守
瓜頗知農事樂從此問生涯
金甌鑄喜夏小暑不足
畏深居如退藏青奴初薦枕
黃妳亦升堂鳥語竹陰密
雨聲荷葉香晚涼無一事
步屨到西廂
明仁宗池亭
納涼夏日多炎熱臨池憩午涼
雨滋槐葉翠風過藕花

香舞燕來青瑣流鶯出建章
援琴彈野操民物樂時康
七言律詩增唐錢起避暑納涼木槿花開畏日長時搖
輕扇倚繩牀初晴草蔓緣新筍頻雨苔衣染舊牆十句
河朔應虛醉八柱天台好納涼無事始知禪靜勝深垂
紗帳詠滄浪 宋陸游逃暑小飲熟睡至暮桑落香浮
榼葉杯甘瓜綠李亦佳哉虛堂頓解汗揮雨高枕俄成
鼻殷雷靜聽風聲生檻竹徐看日影轉庭槐晚涼更動
扁舟興北渚紅蕖已半開 槐影桐陰欲滿廊綸巾羽

扇自生涼新翳玉溼陳雙榼平展風漪可一牀馳騎遠
分丹荔到大盆寒浸碧瓜香湖邊誰謂幽居陋也愛迢
迢夏日長 原明王象晉夏日祝融司令繼芳春四望
郊原樂事均翠浪翻池荷蓋綠黃雲布壠麥痕新榴花
焰焰紅噴火葵葉翩翩影應辰偃仰茂林逃酷暑呼朋
酌酒莫辭頻

五言排律增唐楊巨源夏日裴尹員外西齋看花笑向
東來客看花枉在前始知清夏月更勝豔陽天露濕呈

妝汙風吹畏火燃
葱龍和葉盛爛漫
壓枝鮮紅綠當鈴
閣清香到玉筵
蝶棲驚曙色鶯語
滯晴煙得地殊堪
賞
過時倍覺妍芳菲
遲最好唯是謝家
憐

五言絕句

御製橋望郊原浮麥氣
池沼漾青蘋夏日臨橋
望薰風處處
新

增金字文虛中迴文翠
密圍窗竹青圓貼水荷
睡多嫌
晝永醒少得風和
草徑迷深綠蓮池浴
膩紅早蟬鳴

樹曲鮮鯉躍潭東

七言絕句增唐皮日休藥名離合夏日即事桂葉似茸
含露紫葛花如綬蘸溪黃連雲更入幽深地骨錄閒攜
相蠟郎 高駢山亭夏日綠樹陰濃夏日長樓臺倒影

入池塘水精簾動微風起滿架薔薇一院香 宋司馬

光夏日西齋書事榴花映葉未全開槐影沉沉雨勢來
小院地偏人不到滿庭鳥跡印蒼苔 范成大夏日田

園雜興梅子金黃杏子肥麥花雪白菜花稀日長籬落

無人過惟有蜻蜓蛺蝶飛

五月吳江麥秀寒移秧披

絮尚衣單稻根科斗行如塊田水今年一尺寬 二麥

俱秋斗百錢田家喚作小豐年餅爐飯甑無饑色接到

西風熟稻天 晝出耘田夜績麻村莊兒女各當家童

孫未解供耕織也傍桑陰學種瓜 槐葉初勻日氣涼

葱葱鼠耳翠成雙三公只得三株看閒客清陰滿北窗

千頃笑渠放棹嬉花深迷路晚忘歸家人暗識船行

處時有驚忙小鴨飛 采菱辛苦廢犁鉏血指流丹鬼

質枯無力買田聊種水近來湖面亦收租
楊萬里夏

日不但春妍夏亦佳隨緣花草是生涯
鹿葱解插纖長

柄金鳳仍開最小花
戴昌夏晝小雨小牀新簟展疏

璃窗外新篁一尺圍正午雲橋陣雨過
冬青花上蜜蜂

歸
元僧善佳夏日中庭日午橘花開蜂蝶何知故故

來一陣南熏生殿角亂飄香雪點蒼苔
原明吳寬夏

日綠蔭松蘿暑氣涼清泉瀉入小池塘
人間晝永無聊

賴一朶荷花滿院香
增黃氏幼藻夏日深院塵消散

午炎篆煙如夢晝淹淹輕風似與荷花約爲送香來自
捲簾

詩散句增周庾信槐庭垂綠穗蓮浦落紅衣 陳徐陵嫩

竹猶含粉初荷未聚塵 隋李德林桐枝覆玉檻荷葉滿

銀塘 唐杜甫公子調冰水佳人雪藕絲 嚴維蕙風

清水殿荷氣雜天香 張籍竹月泛涼影螢露澹幽叢

原宋邵雍夏木無重數叢陰翠樹低 秦觀新麥已

登場餘蠶猶占箔 增唐方干樹影興賒侵枕簟荷香

坐久著衣巾

巖溜噴空晴似雨林蘿礙日夏多寒

宋陸游池塘潏潏荷浮葉門巷陰陰筍放梢

元方夔

棟花零落魚初發梅子青黃雨不乾

早麥熟隨芹菜

餉晚茶香和樹芽蒸

原蘇澹林塘乍迸翁孫竹籬落

齊開姊妹花

增晉謝朓夏木轉成帷

周庾信夏餘

花欲盡

唐韓偓暑退松篁健

李顥垂藤引夏涼

李咸用雲水沉沉夏亦寒

宋陸游簷前桐影偏宜夏

詞原宋秦觀如夢令門外綠陰千頃兩兩黃鸝相應睡

起不勝情行到碧梧金井人靜人靜風弄一枝花影

增明陳繼儒攤破浣溪紗棹樹花香月半明棹歌歸去
蟋蟀鳴曲曲柳灣茅屋矮挂魚簪笑指吾廬何處是

一池荷葉小橋橫燈火紙窗脩竹裏讀書聲原宋蘇

庠臨江仙獵獵風蒲初暑過瀟然庭戶秋清野航渡口

帶煙橫晚山千萬疊別鶴兩三聲秋水芙蓉聊蕩槩

一樽同破愁城蓼花灘上白鷗明暮雲連極浦急雨暗

長汀明文徵明青玉案庭下石榴花亂吐滿地綠陰

亭午午睡覺來時自語悠揚魂夢黯然情緒蝴蝶過牆
去 駸駸嬌眼開仍殢悄無人欲出還凝佇團扇不搖
風自舉盈盈翠竹纖纖白苧不受些兒暑

別錄原芸窗類記凡收藏書畫於未梅雨前曬極燥頓
匣櫃中厚以紙糊門及小縫令不通風即不徵古人藏
書多用芸香即今之七里香也匣櫃須用楸梓杉杪之
類忌油松內不用漆 占候夏冰歲饑五穀不成 製
用夏月凡制一切果蔬俱用臘雪水最佳

四月 立夏小滿附見

增禮記月令孟夏之月日在畢昏翼中旦婺女中註日

月會於寶沈而斗建巳之辰也 王瓜生苦菜秀 命

野虞出行田原爲天子勞農勸民毋或失時 農乃登

麥天子乃以彘嘗麥先薦寢廟 聚畜百藥靡草死麥

秋至 原梁元帝纂要是月曰孟夏亦曰首夏 增花

月令是月也杜鵑翔木香升新篁敷粉罌粟滿芍藥相

木筆書空 瓶史月表花盟主芍藥薝蔔夜合花客卿

石巖罌粟玫瑰花使令刺牡丹粉團龍瓜垂絲海棠虞美人棟花

彙考原詩豳風四月秀萼 增夏小正四月囿有見杏

王荈秀取茶傳茶也者以爲君薦蔣也 晉書樂志

四月之管名爲仲呂者呂助也謂陽氣盛長陰助成功也 四月之辰謂爲巳巳者起也物至此時畢盡而起也 四月官田其樹桃 孟夏之月以熟穀禾 律受

夾鐘夾鐘者種始莢也 四民月令四月可種黍謂之

上時 禮斗威儀孟夏驅獸無害五穀 秦中歲時記

長安四月已後自堂厨至百司厨通謂之櫻筍厨 高

僧傳摩歌利頭四月八日浴佛以都梁香爲青色水鬱

金香爲赤色水丘隆香爲白色水附子香爲黃色水安

息香爲黑色水以灌佛頂也 景龍文館記四年四月

上幸司農少卿王光輔莊駕還朝後中書侍郎南陽岑

義設茗飲葡萄漿與學士等討論經史 東坡詩註成

都太守自正月十日至四月十九日浣花乃止 水衡

記麥黃水四月水名 賞心樂事四月芳草亭鬪草笑

蓉池新荷藥珠洞茶蘼滿霜亭菊芽玉照堂青梅豔香

館長春花安閒堂紫笑羣仙繪幅樓前玫瑰餐霞軒櫻

桃詩禪堂盤子山丹花南湖雜花鷗渚亭五色鴛粟花

清閒供四月十四菖蒲誕 史恭馬珏居華陽亭牆

外有來禽一株枯已久矣師四月十四日汲水沃之曰

純陽來年是日生於此樹之下 帝京景物畧四月八

日捨豆兒曰結緣十八日亦捨先是拈豆念佛一豆佛

號一聲有念豆至石者至日熟豆人徧捨之其人亦一

念佛啖一豆也是月榆初錢麵和糖蒸食之曰榆錢糕

立夏增禮記月令是月也以立夏先立夏三日太史

謁之天子曰某日立夏盛德在火天子乃齋立夏之日

天子親帥三公九卿大夫以迎夏於南郊 三禮義宗

四月立夏爲節夏大也至此之時物已長大故以爲名

說林立夏日俗尚啖李時人語曰立夏得食李能令

顏色美故是日婦女作李會取李汁和酒飲之謂之駐

色酒一曰是日啖李令不疰夏 熙朝樂事立夏之日

人家各烹新茶配以諸色細果餽送親戚比鄰謂之七

家茶富室競侈果皆雕刻飾以金箔而香茶名目若茉莉

林檎桂蕊薔薇丁檀蘓杏盛以哥汝瓷甌僅供一啜

而已 嘉吳記俗於立夏日啖青梅云令人終歲神清

不憊睡 小滿增孝經緯立夏後十五日斗指巳爲小

滿 物類相感志青梅過小滿黃蜀葵過小滿則長

集藻文賦散句原晉傅玄述夏賦四月惟夏運臻正陽

和氣穆而崩物麥含露而飛芒清徵泛於琴瑟朱鳥感
於炎荒鹿角解於中野草木蔚其條長 梁昭明太子
錦帶書節屈朱明晷鍾丹陸依依聳蓋俱臨帝女之桑
鬱鬱丹城竝掛陶潛之柳梅風拂戶牖之內麥氣擁宮
闕之前 唐許敬宗麥秋賦葉幄垂秀條帷泛光鶯傳
枝而嬛娜蜂散蕊而芬芳對銀綃而偶稊竝金縷而分
芒改炎炎之鑠石若懔懔之懷霜

五言古詩原晉陶潛讀山海經孟夏草木長遶屋樹扶

疎衆鳥欣有託吾亦愛吾廬既耕亦已種時還讀我書
窮巷隔深轍頗迴故人車歡言酌春酒摘我園中蔬微
雨從東來好風與之俱泛覽周王傳流觀山海圖俯仰
終宇宙不樂復何如 增梁簡文帝和湘東王首夏冷

風雜細雨垂雲助麥涼竹木俱蔥翠花蝶兩飛翔燕泥
含復落鷓吟斂更揚卧石藤爲纜山橋樹作梁欲待華
池上明月吐清光 唐劉禹錫初夏曲時節過繁華陰
陰千萬家巢禽命子戲園果墜枝斜寂寞孤飛蝶窺叢

覓晚花

白居易首夏南池獨酌春盡雜英歇夏初芳

草深薰風自南至吹我池上林綠蘋散還合蘋鯉跳復
沈新葉有佳色殘鶯猶好音依然謝家物池酌對風琴
慙無康樂作秉筆思沈吟境勝才思劣詩成不稱心

宋梅堯臣孟夏二日通判太博惠庭花前日已春盡夏
卉抽嫩青唯君所植花餘紅猶滿庭常惜畏景逼贈未
及飄零欲插爲之醉但慙髮星星

七言古詩原唐李賀四月樂詞曉涼暮涼樹如蓋千山

濃綠生雲外，依微香雨青。
氛氲膩葉蟠，花照曲門金。
閑水搖碧漪，老景沈重無。
驚飛墜紅殘，萼暗參差。

五言律詩

御製夏日迎薰亭苑啓時初夏亭陰午未闌雨過池藻碧日
綻海榴丹水木含清景禽魚得靜觀薰風能解愠試取玉
琴彈 夏日郊行節變春方去清和助麥秋蔚林乘早夏
茂草接新流柳絮隄邊起荷錢水上浮風光殊舊日此意
未曾休 初夏玉泉山二首別館依丹麓疎簾映碧莎泉

聲當檻出花氣入垣多路轉溪橋接舟沿石竇過薰風能
阜物藻景已清和山翠引鳴鑣湖光漾畫橈野雲低隔
寺沙柳暗藏橋百轉黃鸝近雙飛白鷺遙今年農事早時
雨足新苗

增唐韋應物始夏南園思舊里夏首雲物變雨餘草木
繁池荷初貼水林花已掃園縈叢蝶尚亂依閣鳥猶喧
對此殘芳月憶在漢陵原白居易早夏遊平泉迴夏
早日初長南風草木香肩輿頗平穩澗路甚清涼紫蕨

行看採青梅旋摘嘗療饑兼解渴一盞冷雲漿 宋司

馬光首夏呈諸鄰首夏木陰薄清和自一時筍抽八九

尺荷生三四枝新服裁蟬翼舊扇拂蛛絲莎徑熟未劇

晨昏來往宜 陸游幽居初夏梅塢青黃子草陂紅紫

花雙鶯朝戲浦羣鴨暮還家赤脚挑殘筍蒼頭摘晚茶

出門逢野老滿意說桑麻 元白珽餘杭四月四月餘

杭道一晴生意繁朱櫻青豆酒綠草白鷺村水滿船頭

滑風輕袖影翻幾家蠶事動寂寂畫門關 明陳憲章

四月四月陰晴裏山花落漸稀雨聲寒月桂日色煖酴
醾病起初持酒春歸尚掩扉午風吹蛺蝶低趁乳禽飛
生意日無涯乾坤自不知受風荷柄曲擎雨柏枝垂
靜坐觀羣妙聊行覓小詩臨階愛新竹抽作碧參差

七言律詩原唐皮日休四月十五日和陸龜蒙道室書
事望朝齋戒是尋常靜啓金根第幾章竹葉飲爲甘露
色蓮花鮓作肉芝香松膏背日凝雲磴丹粉經年染石
牀剩欲與君終此志頑仙惟恐鬢成霜 宋蔡襄四月

池上風下平池水暈開池邊露坐水風來草香苒苒生
吟席雲影飛飛度酒杯荷葉偶成雙翠蓋荔枝纔似小
青梅人閑物靜兩相得月色蒼涼始肯迴 陸游初夏
閒居城上朱旗夏令初溪頭綠水蘸菰蒲花貪結子無
遺萼燕接飛蟲正哺雛簫鼓賽蠶人盡醉陂塘移稻客
相呼長安青蓋金羈馬也有農家此樂無 戴嵩四月
即景茶歌纔了又田歌節物真成一鳥過蒼竹颭風涼
意足碧梧留雨夜聲多瓜緣茅屋抽長蔓藕過蔬畦出

矮荷最喜白鷗相狎久對人自在浴清波 真山民初
夏一葉薰風帶暑回雨天濃翠與庭槐不隨春去鶯猶
在好競時妝榴又開翦尺旋裁新白苧杯盤聊薦舊青
梅篋中敝扇投閒久依舊團團入手來

五言排律增唐太宗賦得夏首啟節北闕三春晚南榮
九夏初黃鶯弄漸變翠林花落餘瀑流還響谷猿啼自
應虛早荷向心卷長楊就影舒此時歡不極調軫坐相
於 白居易春末夏初閒遊江郭二首閒出乘輕履徐

行蹋軟沙觀魚傷湓浦看竹入楊家林迸穿籬笋藤飄
落水花雨埋釣舟小風颺酒旗斜嫩剝青菱角濃煎白
茗茶淹留不知久城樹欲棲鴉柳影繁初合鶯聲澀
漸稀早梅迎夏結殘絮送春飛西日韶光盡南風暑氣
微展張新小簾熨帖舊生衣綠蟻杯香嫩紅絲鱸縷肥
故園無此味何必苦思歸首夏猶清和聯句記得謝

家詩清和即此時

白居易

餘花數種在密葉幾重垂

裴度芳

謝人人惜陰成處處宜

劉禹錫

水萍爭點綴梁燕共追隨

式白行亂蝶憐疎蕊殘鶯戀好枝張籍草香殊未歇雲勢漸

多奇白居易單服初寧體新篁已出籬裴度與春爲別近覺

日轉行遲劉禹錫繞樹風光少侵階苔蘚滋白居易唯思奉

歡樂長得在西池張籍

七言絕句

御製夏日閒坐雲斂風微紫燕飛春光已去夏初歸清襟
得天然處暗覺花香到玉扉

增宋司馬光初夏首夏清和新雨晴綠莎細軟不妨行

園夫遮道白何事
梔子花開斑笋生
王安石初夏即

事石梁茅屋有彎碕
流水濺濺度兩陂
晴日煖風生麥氣
綠陰幽草勝花時
東坡荷葉初開
筍漸抽東陂南

蕩正堪遊無端隴上
脩脩麥橫起寒風
占作秋陳造

早夏安石榴花猩血
鮮涼荷高葉碧田
田鱗魚入市河

豚罷已是江南打麥
天范成大初夏四
首清晨出郭

更登臺不見餘春
只麼回桑葉露枝
蠶向老菜花成莢

蝶猶來晴絲千尺
挽韶光百舌無聲
燕子忙永日屋

頭槐影暗微風扇裏麥花香 東君不解惜芳菲料峭

寒中一夢非翦盡牡丹梅子綻何須風雨送春歸 一

簾芳樹綠葱葱蝴蝶飛來窺綺叢雪白荼縻紅寶相尚

攜春色見薰風 陸游初夏紛紛紅紫已成塵布穀聲

中夏令新夾路桑麻行不盡始知身是太平人 槐柳

成陰雨洗塵櫻桃酪乳併嘗新古來江左多佳句夏淺

勝春最可人 楊萬里初夏麥黃秧碧百家衣已熟猶

寒四月時雨後覓春無一寸薔薇花發醺燕脂 手種

琅玕劣十年今年新笋不勝繁不知明早添多少日暮
閒來數一番戴敏遊張園乳鴨池塘水淺深熟梅天
氣半晴陰東園載酒西園醉摘盡枇杷一樹金

詩散句增晉謝靈運首夏猶清和芳草亦未歇原謝

眺麥候始清和涼雨消炎燠唐太宗一朝春夏改隔

夜烏花遷增張說庭柳餘春駐宮櫻早夏催原杜

甫摘荷纔首夏驄馬尚餘春錢起花萼敗春多寂寞

葉陰迎夏已清和宋謝伯初園林換葉梅初熟池館

無人燕學飛 蘇軾吳國晚蠶初斷葉占城早稻欲移
秧 陸游采茶歌裏春光老煮繭香中夏景長 風和
柳岸吹綿後雨足瓜畦引蔓時 梅子生仁已帶酸棟
花墮地尚微寒

詞原明陳繼儒攤破浣溪沙蜂欲分衙燕補巢清和天
氣綠陰嬌一陣窗前風雨到打芭蕉 驚起幽人初睡
午茶煙繚繞出花梢有箇客來琴在背度紅橋 夢
得黃金縷睡起流鶯語掩蒼苔房櫳向曉亂紅無數吹

盡殘花無人問惟有垂楊自舞漸煖靄初回輕暑寶扇
重尋明月影暗塵侵尚有乘鸞女驚舊恨鎮如許江
南夢斷衡臯渚看黏天蒲菰漲綠半空煙雨無限樓前
滄波意誰採蘋花寄取空惆悵蘭舟容與萬里雲帆何
時到送孤鴻目斷千山阻誰爲我唱金縷

別錄原占候月內有三卯宜麻無則麥不收月內寒主
旱諺云黃梅寒井底乾諺云有穀無穀且看四月十
六立一丈竿量月影月當中時影過竿雨水多沒田夏

旱人饑長九尺主三時雨水八尺七尺主雨水六尺低
田大熟高田半收五尺主夏旱四尺蝗三尺人饑增
農政全書分龍之日農家於是日早以米篩盛灰藉之
紙至晚視之若有雨點迹則秋不熟穀價高人多閉糶
諺云二麥不怕神共鬼只怕四月八日雨大抵立夏
後雨多便損麥蓋麥花夜吐雨多花損 種植秋王瓜
麥門冬芝麻蘿蔔扁豆粟紫蘓菱莧小豆絲瓜枇杷葱
瑞香芡 移植石菖蒲櫻桃茄秋海棠茉莉梔子秋牡

丹枇杷葱翠雲草菊芋 壓插玉繡毬木樨梔子錦葵
玉蝴蝶木香茶蘼芙蓉 收採絺蔕草白蘚根菜子析
冥子桃杏仁蠶豆柴胡笋乾楮實黃葵花蒼耳子紅花
蕤仁桑椹 整頓防露傷麥翦菖蒲鋤葱索馨斫楮皮
埋蠶沙伐樹絡麻 田忌天火酉九焦耒地火耒糞忌
寅荒蕪申

五月

芒種夏至端午附見

增禮記月令仲夏之月日在東井昏亢中旦危中註日

月會於鵲首而斗建午之辰也 農乃登黍天子乃以

維嘗黍羞以含桃先薦寢廟令民毋艾藍以染 半夏

生木堇榮 原梁元帝纂要五月曰仲夏亦曰暑月臯

月 花月令是月也葵赤紫薇葩薝蔔始馨夜合交榴

花照眼紫椹降於桑 增瓶史月表五月花盟主石榴

番萱夾竹桃花客卿蜀葵洛陽花午時紅花使令川荔

枝梔子花火石榴孩兒菊一丈紅石竹花

彙考增周禮秋官仲夏斬陰木註陰木秋冬生者若松

柏之屬 夏小正五月乃衣瓜傳瓜者急瓜之辭也瓜
者始食瓜也 初昏大火中種黍菽糜時也煮梅爲豆實也蓄蘭爲
火者心也心中種黍菽糜時也煮梅爲豆實也蓄蘭爲
沐浴也 晉書樂志五月之辰謂爲午午者長也大也
言物皆長大也 五月之管名爲蕤賓歲蕤垂下貌也
賓敬也謂時陽氣下降陰氣始起相賓敬也 風俗通
五月落梅風江淮以爲信風 風土記五月有霖霖號
爲梅雨霑衣皆敗謂之送梅雨 歲時雜記仲夏多大

雨名濯枝雨

水衡記五月瓜蔓水五月瓜延蔓故以

名 夢溪筆談五月草木茂盛逾於初生故曰勝先

賞心樂事五月聽鶯堂摘瓜重午節泛蒲煙波觀碧蘆

南湖萱花綺互亭火笑花水北書院采蘋鷗渚亭五色

蜀葵清夏堂楊梅叢奎閣榴花豔香館林檎摘星軒枇

杷 清閒供五月十三竹醉日 芒種增嬾真子錄陝

州夏縣士人樂舉明遠嘗云二十四氣其名皆可解獨

小滿芒種說者不一僕因問之明遠曰皆爲麥也小滿

四月中謂麥之氣至此方小滿而未熟也芒種五月節種該數類之種謂種之有芒者麥也至是當熟矣僕因記周禮稻人澤草所生種之芒種註云澤草之所生其地可種芒種芒種稻麥也僕近為耆農始知過五月節則稻不可種所謂芒種五月節者謂麥至是而始可收稻過是而不可種也古人名節之意所以告農候之早晚深哉夏至增周禮秋官柞氏掌攻草木及林麓夏日至令刊陽木而火之疏夏日至謂五月夏至之日為之也

令刊陽木而火之謂先削以去其皮乃燒之 管子夏
至而麥熟天子祀太宗其盛以麥穀之始也 荆楚歲

時記夏至日食糴取菊爲灰以止小麥蠹按干寶變化
論云朽稻爲蠹朽麥爲蛺蝶此其驗乎 風土記夏至

前芒種後雨爲黃梅雨田家初插秧謂之發黃梅 端

午增玉燭寶典洛陽人家端午造木羹艾酒以花絲作

樓閣插鬢贈遺辟瘟扇 荆楚歲時記五月五日四民

竝蹋百草又有鬪百草之戲採艾爲人懸門戶以禳毒

氣按宗則嘗以五月五日雞未鳴時採艾見似人處攬而取之用灸有驗 是日競渡採雜藥 風土記端午烹鷺進筒糴一名角黍以菰葉裹黏米栗棗以灰煮令熟葢取陰陽包裹未散之象 千金月令端午以菖蒲或鏤或屑以泛酒 採蘭雜志杜羔妻趙氏每歲端午午時取夜合花置枕中羔稍不樂輒取少許入酒令婢送飲羔即歡然當時婦人爭效之 酉陽雜俎五月進五時圖五時花施帳之上 歲時雜記端午刻菖艾爲

小人子或葫蘆形帶之辟邪 吳中歲時記端午簪艾

葉榴花以辟邪 乾淳歲時記端午禁中插食盤架設

天師艾虎意思山子數十座五色蒲絲百草霜以大盒

三層飾以珠翠葵榴艾花蜈蚣蛇蝎蜥蜴等謂之毒蟲

又以大金瓶數十遍插葵榴梔子花環繞殿閣及分賜

后妃諸閣大璫近侍翠葉五色葵榴金絲翠扇真珠百

索釵符經筒香囊軟香龍涎佩帶及紫練白葛紅蕉之

類大臣貴邸均被細葛香羅蒲絲艾朶彩團巧粽之賜

而外郎節物大率效尤焉

熙朝樂事端午爲天中節

家家買葵榴蒲艾植之堂中或採百草以治藥品 東

京夢華錄端午節物百索艾花銀樣鼓兒花花巧畫扇
香糖果子糉子白團紫蘇菖蒲木瓜竝皆葺切以香藥
相和用梅紅匣子盛裹自五月一日及端午前一日賣
桃柳蒲葉葵花佛道艾次日家家鋪陳於門首與糉子
五色水團茶酒供養又釘艾人於門上士庶迎相宴賞
歲華紀麗譜五月五日宴大慈寺設廳醫人鬻艾道

人賣符朱索綵縷長命辟災之物筒飯角黍莫不咸在
遼志五月五日午時採艾葉與綿相和絮衣七事國
主著之臣僚各賜艾衣三事國主及臣僚飲宴渤海厨
子進艾糕各點大黃湯下土呼此時爲討賽離又以雜
絲或綠結合歡索纏於臂膊婦人進長命縷宛轉皆爲
人像帶之

集藻文散句原魏文帝與吳質書麤賓紀時景風扇物
天氣和煖衆果具繁 梁昭明太子錦帶書麥隴移秋

桑律漸暮蓮花泛水豔如越女之顙蘋葉漂風影亂秦
臺之鏡炎風以之扇戶暑氣於是盈樓凍雨洗梅樹之
中火雲燒桂林之上

五言古詩增周庾信奉和夏日應令朱簾捲麗日翠幕
救重陽五月炎氣蒸三時刻漏長麥隨風裏熟梅逐雨
中黃開永帶井水和粉雜生香衫含蕉葉氣扇動竹花
涼早菱生軟角初蓮開細房願陪仙鶴舉洛浦聽笙簧
宋陸游時雨時雨及芒種四野皆插秧家家麥飯羹

處處菱歌長老我成情
農永日付竹牀衰髮短
不櫛愛此一雨涼庭木
集奇聲架藤發幽香
鶯衣濕不去勸我持一觴
即今幸無事海際皆農桑
野老固不窮擊壤歌

虞唐

七言古詩增宋陸游
怡齋東湖仲夏草樹荒
屋古無人亭午涼
萱房微呀不見日
筍籜自解時吹香
野藤蟠屋入窗罅
濕茵扶疎生屋梁
跨溝數椽最幽翳
漲水及檻雨敗牆
靜涵青蘋舞藻荇
間立白鷺浮鴛鴦
笑渠雖瘦

亦瀾漫照眼翠蓋遮紅妝水紋珍簾欲卷却團團素扇
嬾復將天風忽送塔鈴語喚覺清夢遊瀟湘

五言律詩

御製午日令序當重午南臺日正中玉階鳴瀑水瑤軫奏薰
風菖葉浮杯綠榴花照檻紅臨流看競渡轉憶濟川功
途次端午糴賓逢夏律午日俯澄流黃鳥林中變新蒲岸
外稠宮筵傳綵糴仙酒泛丹榴遙憶蓬萊上垂楊陰御溝
增宋陸游重五重五山村好榴花忽已繁糴色分雨髻

艾束著危冠舊俗方儲藥羸軀亦點丹日斜吾事畢一
笑向杯盤

七言律詩原唐李德裕嶺南道中嶺水爭分路轉迷枕
榔椰葉暗蠻溪愁衝毒霧逢蛇草畏落沙蟲避燕泥五
月畬田收火米三更津吏報潮雞不堪腸斷思鄉處紅
槿花中越鳥啼 增元成廷珪夏日過萬蓬菴愛汝東
菴暑氣薄解衣盤礴坐莓苔一林綠竹盡可數五月白
蓮猶未開捉麈談禪知獨往買魚沽酒待重來滄江日

落山更好且放輕舟緩緩迴 明虞堪平日訪沈元圭

席上次韻一簾葵錦爛晴霞五色絲虹映臂紗玄藥自
消頭上雪絳榴誰插鬢邊花茶烹石鼎從施禁詩寫驚
箋學破邪不是西山黃石叟難逢東老地仙家 原何

景明午日五月五日天氣鮮艾葉榴花對眼前鄉土歲
時殊不惡閭閻風俗自堪憐鄰人角黍能相送野老蒲
觴得共傳回首十年車馬地每逢佳節淚潸然 文徵
明仲夏有懷五月江南櫻笋殘疏花吹盡綠漫漫雨來

却及梅黃候春去猶餘麥秀寒白日幽深茆屋靜野情
蕭散苧袍寬美人何處經時別滿耳新蟬獨倚闌

五言絕句增宋蘇軾端午皇帝閣帖子詞採秀擷羣芳

爭儲百藥良太醫初薦艾庶草驗蕃昌 皇太妃閣端

午帖子詞雨細方梅夏風高已麥秋應憐百花盡綠葉

暗紅榴 太皇太后閣端午帖子詞日永蠶收簇風高

麥上塲朝來藉田令菰黍獻時芳 夫人閣端午帖子

詞肅肅槐庭午沈沈玉漏稀皇恩樂佳節鬪草得珠璣

六言絕句增宋龜補之仲夏即事紅葵有雨長穗青棗
無風壓枝溼礎人霑汗際蒸林禪烈號時

七言絕句增宋王安石五月與和叔同遊齊安繅成白
雪桑重綠割盡黃雲稻正青他日玉堂揮翰手芳時同
此賦林垆蘇軾皇太后閣端午帖子詞祕殿扶疎夏
木深雨餘初有一蟬吟應將羸女乘鸞扇更助南風長
棘心上林珍木暗池臺蜀產吳色萬里來不獨盤中
見盧橘時於糴裏得楊梅皇太妃閣端午帖子詞玉

盆沈李灩清泉金鴨噓空裊細煙自有梧楸障畏日仍
欣麥黍報豐年 陸游重午葉底榴花蹙絳繒街頭初

賣苑池冰世間各自有時節蕭艾著冠稱道陵 原僧

道潛臨平道中春蒲獵獵弄輕柔欲立蜻蜓不自由五

月臨平山下路藕花無數滿汀洲 增金趙秉文夏至

玉堂睡起苦思茶別院銅輪碾露芽紅日轉階簾影薄

一雙蝴蝶上葵花 馬定國村居五月南風化蟪蛄野

塘晚筍未成蒲櫝花落盡紅英細沙渚鴛鴦半引雛

元納新月湖竹枝詞五月荷花紅滿湖團團荷葉綠雲
扶女郎把釣水邊立折得柳條穿白魚

詩散句原唐李白大火五月中景風從南來數枝石榴
發一丈荷花開五月梅始黃蠶稠桑柘空山花異
人間五月雪中白增宋李邦直艾葉成人後榴花結
子初唐陳羽池上樓臺五月涼百花開罷水芝香

方干長潭五月來冰氣孤檣中宵學雨聲宋章得象
五日看花憐竝蒂今朝鬪草正宜男花陰轉午清風

細玉燕釵頭艾虎輕 陸游瓜蔓水生初抹岸梅黃雨

細欲遮樓 戴復古海榴花上雨蕭蕭自切菖蒲泛濁

醪 元周權人家綠艾端陽節天氣黃梅雨細時 顧

瑛梧竹一庭涼欲雨池臺五月氣涵秋 明唐順之榴

吐千花承雨葢萸開五葉拂瑤墀 唐韓翃寒水浮瓜

五月時 薛能槐柳陰陰五月天 宋王珪瑤墀九御

薦菖華 秦觀菡萏吹風五月秋 章得象菖蒲泛酒

堯樽綠 元馬士熙曲闌五月櫻桃紅

詞原宋蘇軾阮郎歸綠槐高柳啣新蟬薰風初入絃碧
沙窗下水沈煙碁聲驚晝眠微雨過小荷翻榴花開
欲然玉盆纖手弄清泉瓊珠碎又圓吳禮之喜遷鶯
梅霖初歇正絳色海榴爭開佳節角黍包金香蒲切玉
是處玳筵羅列關巧已輸年少玉腕綵絲雙結艤畫舫
見龍舟兩兩波心齊發奇絕難畫處激起浪花翻作
湖間雪畫鼓轟雷紅旗掣電奪罷錦標方徹望中水天
日暮猶自珠簾高揭棹歸晚載荷香十里一鉤新月

增劉克莊賀新郎思遠樓前路望平隄十里湖光畫船
無數綠葢盈盈紅粉面葉底荷花解語鬪巧結同心雙
縷尚有經年離別恨一絲絲總是相思處相見也又重
午清江舊事傳荆楚歎人情千載如新尚沈菰黍且
盡樽前今日醉誰肯獨醒千古泛幾盞菖蒲綠醕兩兩
龍舟爭競渡奈珠簾暮捲西山雨看未足怎歸去

別錄原占候博雅月內有三卯宜稻及大小豆無則宜
早豆五月大種瓜不下五月小種秧必須早五月

小瓜果吃不了

田家五行志夏至在月初主雨水調

諺云夏至端午前坐了種田年夏至在月中耽閣糶米

翁 夏至值甲寅丁卯粟貴

朔日值芒種六畜災值

夏至冬米大貴

十日得辰早禾半收十一日得辰五

穀不收

歲時記夏至在初二三主米麥貴初五米貴

諺云夏至連端午家家賣兒女初七八米麥平二十大

饑上旬米賤中旬大豐米大賤末旬大歉米大貴

便

民圖纂五月暴熱之時看窠草忽自枯死主有水種

植晚大豆夏蘿蔔黑豆黃豆晚菰菜赤豆菜豆瓜 移

植枇杷月季荼蘼薔薇木香櫻桃石榴錦帶棠棣玉堂
春西河柳橘瑞香寶香素馨剪春羅竹橙 收採菖蒲

蒜臺麥諸菜子馬齒莧青箱子卷柏藤花莧天茄苗白
花菜大小薊旋覆花紅花萱花杜仲蛇牀子馬蘭子酸
漿草黃柏槐花浮萍蒲公英益母草車前子金銀花天
麻艾水仙根豨薟草罌粟子麻黃澤瀉 整頓割苧麻
砍桑枝糞桑採練葛 製用金門歲節重午日午時有

雨則急斫一竹竹節中必有神水瀝取和獺肝爲圓治
心塊腹聚等病 田忌天火子地火酉荒蕪巳九焦卯
糞忌午

六月 伏附見

增禮記月令季夏之月日在柳昏火中旦奎中註日月
會於鶉火而斗建未之辰也 溫風始至 命澤人納
材葦 樹木方盛命虞人入山行木毋有斬伐 原花
月令是月也萱宜男鳳仙來儀菡萏百子凌霄登茉莉

來賓玉簪搔頭

增瓶史月表六月花盟主蓮花玉簪

茉莉花客卿百合山丹山礬水木樨花使令錦葵錦燈
籠長雞冠仙人掌蘋桐鳳仙花

彙考原詩幽風六月食鬱及薺

增夏小正六月煮桃

傳桃也者拖桃也拖桃也者山桃也煮以爲豆實也

晉書樂志六月之辰謂之未未者味也言時萬物向成

有滋味也

六月之管名爲林鍾林者林茂也謂時物

茂盛於野也

雲仙雜記房壽六月召客坐湘竹簟凭

狐文几編香藤爲俎刻椰子爲杯搗蓮花製碧芳酒調
羊酪造含風酢皆涼物也 內觀日疏六月廿四日爲

觀蓮節鼃采與其夫各以蓮子饋遺爲歡 夢溪筆談

六月萬物小盛故曰小吉 暇日記六月山礬水 賞

心樂事六月蒼寒堂後碧蓮碧宇竹林避暑芙蓉池賞

荷花約齋夏菊清夏堂新荔枝霞川食桃 吳郡記荷

花蕩在葑門之外每年六月廿四日遊人最盛畫舫雲

集露幃則千花競笑舉袂則亂雲出峽揮扇則星流月

映聞歌則雷輓濤趨蘇人遊冶之盛至是日而極矣

伏原四民月令初伏薦麥瓜於祖禰 東京夢華錄都

人最重三伏蓋六月中別無時節往風亭水榭峻宇高
樓雪檻冰盤沈李浮瓜流杯曲沼芭鮓新荷遠邇笙歌
通夕始罷 增清閒供六月初伏薦麥瓜中伏碧筒勸
竹篠飲二十四日蓮誕

集藻文散句原梁昭明太子錦帶書三伏漸終九夏將
謝螢飛腐草光浮帳裏之書蟬噪繁柯影入機中之鬢

濯枝遷潦溢芳槿茂而發榮山土焦流金海水沸而漂
爍

五言古詩增宋晁補之夏季夏季百果繁兔葵亦成實
獨有野石榴幽花時熠熠熠熠非獨好芳榮賴午日翩
翩彼白蜨髣髴采挹睡餘起對此嘉興亦蕭瑟良非
阡陌麗敢競陽春出無言以成蹊上愧桃李質幸當飽
霜餘萬顆富君室

七言古詩增宋蔡襄甲辰初伏快雨涼風晝眠初覺庭

前小欄花木各有意氣效柏梁體閏夏天氣熟焰烘崇

朝快雨隨清風晝軒夢覺開前櫳畫欄花草意氣雄側

枕遙聞數異同如此微物煩化工盍各言爾之所從繁

葩富豔生朱紅

川海棠

枯條大蕊千萬重

緋桃

脩幹點綴赤

日中

蜀葵

蠲去憂忿誰與功

萱草

採摘烹煮祛煩習

百秋霜

巨實垂如甕

木瓜

橫柯遠引交加叢

紅玫瑰

葉抽綠劍端黃

茸

山薑

直立開披泉貨通

金錢

疊繞翠羽翻蚪龍

薜荔

誤入畦

町非余公

蒨麻

助滌渴肺思匪躬

冬麥

門

物物自名詞不窮

願當我意乃汝容負汝不飲慙衰翁 歐陽修初伏日

招王幾道小飲北園數畝官牆下嗟我官居如傳舍
渚沱北渡馬踏冰西山病歸花已謝落英不見空繞樹
細草初長猶可藉空園一鎖不復窺不覺芳蹊繁
早夏隔牆時時聞好鳥如得嘉客聽清話今朝試
去繞園尋綠李橫枝礙行馬蒲萄憶見初引蔓翠
葉陰陰還滿架紅榴最晚子已繁猶有殘花藏
葉罅人生有酒復何求官事無了須偷暇古云
伏日當早歸况今著令許休假能

來解帶相就飲爲子埽月開風榭

七言律詩原唐王維積雨輞川莊作積雨空林煙火遲
蒸梨炊黍餉東菑漠漠水田飛白鷺陰陰夏木囀黃鸝
山中習靜觀朝槿松下清齋折露葵野老與人爭席罷
海鷗何事更相疑 增宋韓琦六月六日雨後過嶽廟
遊從封寺觀稼暑雨頻經信宿休近郊方出釋潛憂雖
妨麥始二停獲且見苗知一半收神嶽怖民藏電電老
松憑寺偃蛟虬佳遊況遇從豐識好飾千倉待有秋

七言絕句原宋蘇軾西湖畢竟西湖六月中風光不與
四時同接天蓮葉無窮碧映日荷花別樣紅

詩散句增宋蘇軾遶郭荷花一千頃誰知六月下塘春
元龔璘六月涼如水熨齒枇杷移陰碧書几 梁庾
信六月蟬鳴稻

詞原明陳繼儒浪淘沙風雨霎時晴荷葉青青雙鬟捧
著小紅燈報道綠紗廊底下蕉月分明 枕簟嫩涼生
茉莉香清蘭花新吐百餘莖撲得流螢飛去也團扇多

情

別錄原占候六月無蠅主米價平諺云六月無蠅新舊
相登 三伏宜熱諺云六月不熱五穀不結蓋當槁稻
之時又當下壅晴熱則苗旺涼雨則苗沒立秋在晦旱
稻遲 種植秋赤豆秋菜豆豇豆蘿蔔胡蘿蔔素馨芥
菜晚瓜蔓青小蒜 壅培麥冬橙芋韭橘 灌溉菊牡
丹芍藥茉莉 收採花椒苧竹青箱子紫草槐花藕天
仙子蓮鬚蓮花松香杜仲鳳仙花莖菱科苜宿蓮房茅

根乾漆藿香白芷葛莧菜葦草茵郁李根野白薺地踏
菜燈草旋覆花眼子菜澤瀉整頓鋤竹園漚麻耕麥
地製用洽聞記日濟國西南海中有三島各相去數
十里其島出黃漆似中夏漆樹彼土六月破樹腹取汁
以漆器物若黃金其光奪目田忌天火卯九焦子糞
忌子地火巳荒蕪辰

御定佩文齋廣羣芳譜卷四

謹案卷四第三十二頁後一行納新舊作迺賢今

改後倣此

謹案第二十頁前八行綠莎細軟不妨行刊本莎
訛荷據宋詩本改


第二十頁後二行石梁茅屋有彎碕刊本梁訛渠
據王荊公集改

第二十二頁前七行葉夢得黃金縷按夢得係宋
人今列於明人陳繼儒之後似誤

第二十五頁後四行其地可種芒種芒種稻麥也
刊本脫下芒種二字據周禮注增

第三十三頁前二行戴復古刊本復訛履今改





總校官庶吉士臣侍朝

校對官檢討臣王福清

謄錄監生臣孔廣枚